

南北史合注

欽定四庫全書

南北史合注卷八十六

明 李清 撰

南史八十六

留異

陳寶應

侯景字萬景魏懷朔鎮人少而不羈魏末北方大亂乃

事邊將爾朱榮甚見器重初學兵法於榮部將慕容超宗未幾超宗每詢問焉後以軍功

梁書曰景以私衆見榮榮甚竒之委以軍事會葛榮南逼榮自討命景先驅至河內擊葛榮大破之

為定州刺史始東魏相高歡微時與景甚相友好及歡誅爾朱氏景以衆降仍為歡用

梁書曰景性殘酷馭軍嚴整然所得財寶皆班賜將士故咸為之用所向多捷

稍至吏部尚書非其好也每曰當離此反故紙邪尋封
濮陽郡公

資治通鑑曰高歡與宇文泰戰敗沙苑將濟河景曰
今茲舉兵形勢極大萬一不捷猝難收斂不如分為
二軍相繼而進前軍若後勝軍合力軍若敗後軍承
之歡不從以渭曲葦深欲火之景曰當生擒魚獺以
以示百姓若衆中焚死誰復信之歡即從之竟以戰
敗

歡敗於沙苑景謂歡曰宇文泰恃戰勝今必致急請以數十勁騎至關中取之歡告妃婁氏曰彼若得泰亦將不歸得泰失景於事奚益歡乃止後為河南道大行臺位司徒又言於歡曰向恨不得泰今請兵三萬橫行天下要須濟江縛取蕭衍老公作太平寺主歡壯其言使擁兵十萬專制河南仗任若已半體景右足短弓馬非其所常唯以智謀時歡部將高昂彭樂皆雄勇冠時唯景常輕之言似承災爾勢何所至及將鎮河南請於勸

曰今握兵在遠姦人易生詐偽大王若賜以書請異於
他者許之每與景書別加微點雖子弟弗知及歡疾篤
梁書曰歡疾篤謂子澄曰侯景狡猾多計反覆難知
我死必不為汝用

其世子澄矯書召之景知偽

愚按高歡疾篤時見澄色憂諄諄畫制景策豈於加
點事獨不道破乃資治通鑑云景得書無點辭不至
何也歡忘之耶吾未敢信

崔禍因用王偉計乃以太清元年二月遣其行臺郎中
丁和上表求降

梁書載表曰高澄天性險忌觸類纔嫉累信見召懼
讒畏勢拒而不返遂觀兵汝潁擁旆周韓舉函谷以
東瑕丘以西歸誠聖朝青徐數州僅須折簡一驛走
來不煩經略黃河以南臣之所掌若齊宋一平徐事
燕趙

帝召羣臣議之尚書僕射謝舉等皆議納景非便武帝

不從初帝以是歲正月乙卯讀佛經於善言殿謂左右
黃慧弼曰我昨夢天下太平爾識之及和至校景實以
正月乙卯日定計帝由是納之封河南王大將軍使持
節督河南北諸軍事大行臺承制如鄧禹故事高澄嗣
事為勃海王

資治通鑑曰澄遣武衛將軍元柱將數萬衆晝夜兼
行襲景遇景於潁川柱等大敗景以梁師未至退保

潁川

遣其將慕容紹宗圍景於常社景急乃求剡魯陽長社
東荆北袞請救於西魏

資治通鑑曰景恐上責之遣中兵參軍柳昕奉啓以
為王旅未接死亡交急遂求拔關中臣既不容於高
氏豈見容於宇文但螫手解腕事不得已今以四州
為餌敵資已令宇文遣人入守自豫州以東齊海以
西悉臣空壓現有之地盡歸聖朝懸瓠項城徐州南
充須迎納願陛下速救境上各置重兵與臣影響不

使差互上報之曰大夫出境尚有所專况始創奇謀
將建大業理須隨以應卿誠心有本何假辭費

魏遣五城王元慶等率兵救之紹宗乃退景復請兵於
司州刺史羊鴉仁遣長史鄧鴻率兵至汝水元慶之軍
夜遁鴉仁乃據懸瓠時景將蔡道遵北歸言景有悔過
志高澄信之乃以書喻景若還許以豫州刺史終其身
所部文武更不追攝闔門無恙并還寵妻愛子景報書
不從

梁書載景書曰僕鄉曲布衣出身為國綿歷二紀富貴當年今北面相抗何哉實以妻子在宅無事見園專欲屠剪損軀非義身名並滅故耳尊王在昔見與比肩共獎帝室雖形勢參差寒暑小異丞相司徒鴈行而已福祿官榮自是天爵勞而後授理不相干欲求吞炭何其謬也魏德雖衰天命未改祈恩私第何足闕言今梁道雍熙招攜以禮被我獸文康之好爵吳楚剽勁帶甲千群吳兵冀馬控弦十萬兼僕所部義

勇如林此而為弱孰足為強書稱士馬精新尅日齊
舉指期盪滅徒知北方之力爭未識西南之合從彼
既嗤僕愚速此亦笑君晦昧今已引二邦揚旌北討
態弱齊奮克復中原荆襄廣潁已屬關右項誠懸瓠
亦奉南朝幸自取之何勞恩賜復尋來書云僕妻子
悉拘司寇當是見疑褊心未識大趣昔王陵附漢母
在不歸太上囚楚乞羹自若矧伊妻子而可介意脫
謂誅之有益欲止不能殺之無損徒復坑戮家累在

君何聞僕也昔與盟主事等琴瑟護人間之翻為仇敵撫弦搦矢不覺傷懷裂帛返書知何能述

澄知景無歸志

三國典畧曰澄欲間景於梁與景書而謬其辭云本使景佯叛欲與圖西魏西人知之故景更圖南瀹其書於梁梁人亦不信也

乃遣軍相繼討景帝聞鴉仁已據懸瓠遂命羣師指授方畧大舉攻東魏以貞陽侯淵明為都督淵明軍大敗

見俘紹宗攻潼川刺史郭鳳棄城走景乃遣其行臺左丞王偉左民郎民王則詣闕獻策請元氏子弟立為魏王

資治通鑑載偉等言曰鄴中文武合謀召臣共討高澄事泄澄幽元善見於金墉殺諸元六十餘人河北物情俱念其主請元氏一人以從民望則君有繼絕之名臣有立功之望河之南北為聖朝邦莒國之男女為大梁臣妾

詔遣太子舍人 貞為咸陽王頊渡江許即位以乘輿
之副資給之高澄又遣慕容紹宗追景景退保渦陽
三國典畧曰景與段韶夾渦而軍韶潛於上風縱火
景衆騎入水出而却走火不復燃

使謂紹宗曰欲送客邪將定雄雌邪紹宗曰將決戰遂
順風以陣景閉壘頃之乃出紹宗曰景多詭好乘人背
使備之果如其言景命戰士皆被短甲短刃但低視斫
人脰馬足遂敗紹宗軍裨將斛律光尤之紹宗曰吾戰

多矣未見此賊之難爾其當之光被甲將出紹宗戒之
曰勿渡渦水既又為景敗

資治通鑑曰光與張恃顯陣於水北光輕騎射之景
臨渦水謂光曰汝求勲而來我懼死而去我汝之父
友何為射我汝豈自解不度水南必紹宗教汝光無
以應景使其徒田遷射光司洞胸光易馬隱樹又中
之退入於軍景擒恃顯既而捨之光走入譙城

紹宗謂曰定何如也相持連月景食盡誑其衆謂家口

並見殺衆皆信之紹宗遙謂曰爾等並完乃被殺髮向
北斗誓之景士卒並北人不樂南渡其將暴顯等各率
所部降紹宗景軍潰散喪甲士四萬人馬四千疋輜重
萬餘兩乃與腹心數騎自硤石濟淮稍收騎卒得馬步
八百人南過小城城人登陴詎之曰跋脚奴何為景怒
破城殺言者而去晝夜兼行追軍不敢逼使謂紹景曰
景若就擒公復何用紹宗乃縱之既莫適所歸馬頭戍
主劉神茂為韋黥不容因是踣馬乃馳謂景曰壽陽去

此不遠城池險固韋黯是監州耳王若次近郊彼必郊迎因而執之可以集事得城後徐啓以聞朝廷喜王南歸必不責也景執其手曰天教也及至黯授甲登陴景謂神茂曰事不諧矣對曰黯儒而寡智可說下也乃遣豫州司馬徐思玉夜入說之黯乃開門納景景執黯數之將斬黯久乃見釋乃遣於子悅馳以敗聞自求貶削優詔不許復求資給即授南豫州刺史本官如故帝以景兵新破未忍移易故以鄱陽王範為合州刺史即鎮

合肥魏人攻懸瓠糧少羊鵝仁去懸瓠歸義陽魏人入
懸瓠更求和親帝召公卿謀之張綰朱异咸請許之景
聞未信乃偽作鄴人書求以貞陽侯淵明易景帝將許
之舍人傅岐曰侯景以窮歸義棄之不詳且百戰之餘
寧肯束手受繫謝舉朱异曰景奔敗之將一使力耳帝
從之復書曰貞陽旦至侯景夕反景謂左右曰我知吳
兒老公薄心腸又請娶於王謝帝曰王謝門高非偶可
訪朱异以下景恚曰會將吳兒女配奴王偉曰今坐聽

亦死舉大事亦死王國之於是遂懷反計屬城居人悉
占募為軍士輒停責市估及田租民間子女悉配將士
又啓求錦萬疋為軍人袍中領軍朱异議御府錦署止
充領賞不容供邊用請送青布給之又以臺所給仗多
不能精啓請東冶鍛工欲更營造敕並給之初景自渦
陽敗歸後多所徵求朝廷含弘未嘗拒絕是時貞陽侯
淵明遣使還梁述東魏請追前好許放還帝覽之流涕
乃報淵明啓當別遣行人帝亦欲息兵乃與魏和通景

聞之懼馳啓固諫

資治通鑑載啓曰高氏心懷鴆毒怨盈北土人願天
從歡身殞越子澄嗣惡討滅待時所以昧此一勝者
蓋天蕩澄心以盈凶毒耳澄苟行合天心腹心無疾
又何亟亟奉璧求和豈不以秦兵扼其喉胡騎迫其
背故甘辭厚幣取安大國臣聞一日縱敵數世之患
何惜高澄一豎以棄億兆之心竊謂北魏安強莫過
天監之始鍾離之役匹馬不歸當其強也陛下尚伐

而取之及其弱也反慮而和之舍已成之功縱將死之
鹵使其假命強梁以遺後世非直愚臣扼臣扼腕實亦
志士痛心昔伍員奔吳楚邦卒滅陳平去項劉氏用
興臣雖才劣古人心同往事誠知高澄忌賈在翟惡
會居秦求盟請和冀除其患若臣死有益萬殞難辭
惟恐千載有穢良吏及遣使弔澄景又啓曰臣與高
氏累隙已深仰憑威靈冀雪仇恥今陛下復與高氏
連和使臣何地自處乞申後戰宣暢皇威上報之曰

朕與公大義已定豈有成而相納敗而相棄今高氏
有使求和朕亦更思偃武進退之宜國有常制公宜
清靜自居景又啓曰臣今蓄糧聚衆秣馬潛戈指日
計期克清趙魏不願軍出無名故以陛下為主耳今
陛下棄臣遐外南北復通將恐微臣之身不免高氏
之手上又報之曰朕為萬乘主豈可失信一物想公
深得此心不勞再啓也 愚按貞陽侯淵明易侯景
事通鑑載於此數啓後宜從通鑑

帝不從爾後表䟽䟽危言辭不遜又聞遣伏挺徐陵使
魏不知所為元貞知景異志屢啓還朝景謂曰將定江
南何不少忍貞益懼奔還建鄴具以事聞

通鑑曰上以貞為始興內史亦不問景

景又招司州刺史羊鴉仁同還鴉仁錄送其使時鄴陽
王範鎮合肥及鴉仁俱累啓稱景有異志朱异曰侯景
數百叛鹵何能為抑並役不奏聞景姦謀益果乃上言
曰高澄狡猾寧可全信陛下納其說語求與連和臣亦

竊笑臣行年四十有六未聞江左有佞邪之臣一旦入朝乃致詔讓寧堪粉骨投命僂門請乞江西一境受臣控督如其不許即領甲臨江上向閩越非朝朝廷自恥亦三公盱食帝使朱异宣荅景使曰譬如貧家畜十客尚能得意朕惟有一客致有忿言亦朕失也景又知臨賀王正德怨望朝廷密令要結正德許為內應二年八月景遂發兵反於豫州城內集其將帥登壇歃血是日地大震於是誅中領軍朱异少府卿徐麟太子左率

陸驗制局監周石珍為辭且言姦臣亂政請帶甲入朝
先攻馬頭木柵執太守劉神茂戍主曹瑯等帝聞之笑
曰是何能為吾折箠答之耳乃敕斬景者不問南北人
同賞封二十戶兼一州刺史其人徐主帥欲還北不須
州者賞絹布二萬以禮發遣於是詔合州刺史鄱陽王
範為南道都督北徐州刺史封山侯正表為北道都督
司州刺史柳仲禮為西道都督通直散騎常侍裴之高
為東道都督同討景景濟自厯陽又令侍中開府儀同

三司邵陵王綸持節董督衆軍景聞之謀於王偉偉曰
莫若直掩揚都臨賀反其內大王攻其外天下不足定
也兵聞拙速不聞工遲今便須進路不然邵陵及人九
月景發壽春聲云游獵人不覺也留偽中軍大都督王
貴顯守壽春出軍偽向合肥遂襲譙州助防董紹先降
之執刺史豐城侯泰帝聞之遣太子家令王質率兵三
千巡江遏防景進攻厯陽太守莊鐵鐵遣弟均夜斫景
營戰沒鐵母愛其子勸鐵降景拜其母鐵乃勸景曰急

則應機緩則致禍

資治通鑑載鐵言曰國家承平年久人不習戰聞王
舉兵內外震駭宜乘此際速趨建康可立成大功若
使朝廷徐得為備內外小安遣羸兵千人直據采石
雖精甲百萬其何能濟

景乃使鐵為導是時鎮戍相次啓聞朱异尚曰景必無
渡江志蕭正德先遣大舟數十艘偽載荻實擬濟景景
至江將渡慮王質為梗俄質被追為丹陽尹無故自退

景聞朱信密遣覘之謂使曰質若退折江東樹枝為驗覘人如言而反景大喜曰吾事辦矣乃自采石濟江馬數百匹兵八千人都下弗覺景即分襲姑熟執淮南太守文成侯寧遂至慈湖南津校尉江子一奔還建鄴皇太子見事急入啓帝曰請以事垂付願不勞聖心帝曰此自汝事何更問為太子仍停中書省指授內外撥亂相劫不復通詔以揚州刺史宣城王大器為都督內外諸軍事都官尚書羊侃為軍師將軍副之遣南浦侯持

守東府城西豐公大春守石頭輕車長史謝禧始興太守元貞守白下既而景至朱雀航遣徐思玉入啓乞帶甲入朝除君側之惡請遣了事舍人出相領解實欲觀城中虛實帝遣中書舍人賀季主書郭寶亮隨思玉勞景於板橋景北面受敕季曰今日之舉何以為名景曰欲為帝耳王偉進曰朱异徐驎諂黷亂政欲除姦臣耳景既出惡言留季不遣寶亮還宮先是大同中童謡曰青絲白馬壽陽來景渴陽之敗求錦朝廷給以青布及

是皆用為袍采色尚青景乘白馬青絲為轡欲以應謠
蕭正德屯丹陽郡至是率所部與景合建康令庾信率
兵千餘人屯航北及景至徹航始除一舶見賊軍皆著
鐵面

資治通鑑曰信方食甘蔗有飛矢中門柱信手甘蔗
應弦而落

遂棄軍走南塘游軍復閉航度景太子以所乘馬以授
王質配精兵三千使授庾信質至領軍府與賊遇未陣

便奔景乘勝至闕下西豐公大春棄石頭城走景遣其
儀同於子悅據之謝禧元貞亦棄白下城走景遣百道
攻城

資治通鑑曰鳴鼓吹脣喧聲震地

縱火焚大司馬東西華諸門城中倉卒未有備乃鑿門
樓下水沃火久方滅

三國典畧曰景焚大司馬門後閣舍人高善寶以私
金千兩賞戰士直閣將軍宗思領將士數十人出城

泗水久之火滅

賊又斫東掖門將入羊侃鑿門扇刺殺數人賊乃退又登東宮牆射城內至夜簡文募人出焚東宮臺殿遂盡所聚圖籍數百厨一皆灰燼先是簡文夢有人畫作秦始皇云此人復焚書至是驗景又火城西馬廐士林館太府寺明日景又作木驢數百攻城城上擲以石並皆碎破賊又作尖頂木驢狀似楷石不能破乃作雉尾炬灌以膏蠟囊擲焚之賊攻既不克士卒死者甚多乃止

攻築長圍絕內外又啓求誅朱昇陸驗徐麟周石珍等
城內亦射賞格出外有能斬景首授以景位并錢一億
萬布絹各萬疋女樂二部莊鐵慮累不克乃奔厯陽紹
言景已為臺軍梟首國家使我歸鎮景城守郭駱懼棄
城走壽陽鐵得入城遂奉其母奔壽陽十一月景立蕭
正德為帝位即偽位居儀賢堂改年正平識者以為正
德卒當平珍也景自為相國天柱將軍又攻東府城設
百尺樓車鉤城堞盡落城陷景使其儀同盧暉略率數

十人持長刀夾城門悉驅城內文武裸身而出交兵殺之死者三千餘人南浦侯推是日遇害

資治通鑑曰景載其屍聚於杜姥宅遙語城中人曰若不早降當如此

景使正德子見理及暉略守東府城初景至都便唱云帝已晏駕雖城中亦以為然簡文慮人情有變乃請駕巡城帝將登城陸驗諫曰陛下為萬乘之重豈可輕脫因泣下帝深感其言乃幸大司馬門城上聞蹕聲鼓譟

軍人莫不屑涕士民乃安景曰於城東西各起土山臨城城內亦作兩山應之簡文以下皆親畚鍤初景至便望克定建鄴號令甚明不犯士民既攻不下人心離沮又恐援軍摠集衆必潰散乃縱兵殺掠交尸塞路富室豪家恣意剝子女妻妾悉入軍營又募北人先為奴者並令自拔賞以不次朱异家黥奴乃與其儕踰城投賊景以為儀同使至闕下以誘城內乘馬披錦袍詬曰朱异五十年仕宦方得中領軍我始事侯王已為儀同

於是奴僮競出盡皆得志

資治通鑑曰朱忌遣景書為陳禍福景報書并告城中士民以為梁自近歲以來權幸用事割剝齊民以供嗜欲如曰不然公等試觀今日國家池苑王公第宅僧尼寺塔及在位庶寮姬妾百室僕從數千不耕不織錦衣玉食不奪百姓從何得之僕所以趨赴闕廷指誅權佞非傾社稷今城中望四方入授僕觀王侯諸將志在全身誰能竭力效死與吾爭勝負哉長

江天險二曹所嘆吾一葦航之日明氣淨幸各三思
自求元吉景又表東魏主曰臣進取壽春暫欲停憩
而蕭衍識此運終自辟寶位臣軍未入其國已投同
泰捨身去月二十九日已屆建康江海未蘇干戈暫
止永言故鄉人馬同戀尋當整轡以奉聖顏臣之母
弟久謂屠滅近奉明教始承猶在斯乃陛下寬仁大
將軍思念臣之弱劣如何仰報今輒齎啓迎母弟妻
兒伏願聖慈特賜裁放願愚接景南北兩啓必皆王

偉代草予故備錄之以著其謫云

景食石頭常平倉既盡便掠居民爾後米一升值七八萬錢人相食有食其子者又築土山不限貴賤晝夜不息亂加歐捶夜羸者殺以填山哭聲動天地百姓不敢藏隱並出從之旬日間衆至數萬景儀同范桃棒密貪重賞求以甲士二千人來降以景首應購遣文德主帥前白馬游軍主陳昕夜踰城入密啓言狀簡文以啓帝帝大悅使報桃棒事定許封河南王鑄銀券與之簡文

恐其詐猶豫不決帝怒曰恐降常理何忽致疑朱异傳
岐同請納之

資治通鑑載二人言曰桃棒降必非謬桃棒既降賊
景必驚乘此擊之可大破也

簡文曰吾堅城自守所望外援外援若至賊豈足平若
開門納桃棒桃棒之意尚難知一旦傾危悔無及矣桃
棒又曰今止將所領五百餘人若至城門自皆脫甲乞
朝廷賜容事濟時保擒侯景簡文見其言愈疑之朱异

以手搥胃曰今年社稷去矣俄桃棒軍人魯伯和告景
並烹之

愚按桃棒不遠之復宜與陳昕俱改節義所以改昕
不改桃棒猶以蜜貪重賞見利非見義故也

至是邵陵王綸率西豐公大春新塗公大成永安侯確
南安鄉侯駿前譙州刺史趙伯超武州刺史蕭弄璋步
兵校尉尹思合等馬步二萬發自京口直據鍾山景黨
大駭咸欲逃散分遣萬餘人拒戰綸大破之於愛敬寺

下景初聞綸至懼形於色及敗軍還尤言其善愈恐命
具舟石頭將北濟任約曰去鄉萬里走欲何之戰若不
捷君臣同死草間乞活約所不為景乃留宋子仙守壁
自將銳卒拒綸陣於覆舟山北與綸相持會暮景退還
南安侯駿率數十騎挑之景回軍駿退時趙伯超陣於
玄武湖北見駿退亦率軍走衆軍潰亂遂敗績綸奔京
口是日鄱陽世子嗣裴之高至後渚結營蔡洲景分軍
屯南岸

資治通鑑曰景悉驅居民於水北焚其廬舍大街居民掃地頓盡

十二月景造諸攻具及飛樓撞車登城車鉤堞車階道車火車並高數大車至二十輪陳于闕前百道攻城以火焚城東南隅大樓因火勢攻城

資治通鑑曰材官吳景有巧思於城內構地為樓火燒滅新樓即立賊以為神

城上亦擲雉尾炬悉火其攻具賊乃退是時景土山成

城內亦築土山成太子宣城王以下皆親負土執畚鍤
以太府卿韋黯守西土山左衛將軍柳津守東土山山
起芙蓉層樓高四大錦以錦罽捍以烏瑩山峯相近募
敢死士厚衣袍鎧名曰僧勝客配二山交稍以戰鼓叫
沸騰昏旦不息土山攻戰既苦人不堪命柳津命作地
道以取其土外山崩壓賊且盡賊又作塬墓車運土石
填塹戰士升之樓車四面並至城內飛石碎其車賊死
積於城下

資治通鑑又曰於城內作飛橋懸罩二士山上景象
見飛橋迫出崩騰而走

賊又掘城東南角城內作迂城形如却月以捍之賊乃
退棄土山不復修自焚其攻具材官將軍宋綦降賊因
為立計引玄武湖水灌臺城闕前御街並為洪波矣又
火南岸居民營寺莫不咸盡司州刺史柳仲禮衡州刺
史韋粲南陵太守陳文徹宣猛將軍李孝欽等皆來援
鄱陽世子嗣裴之高又濟江柳仲禮營朱雀航南陽裴

之高營南苑韋粲營青塘陳文徹李欽屯丹陽郡鄱陽
世子嗣營小航南並緣淮造柵及旦景方覺乃登禪靈
寺門樓望見之韋粲營壘未合度兵擊之粲敗景斬粲
首徇城下柳仲禮聞粲敗不遑貫甲與數十人赴之遇
賊斬首數百投水死者千餘人仲禮深入馬陷泥亦被
重創自是賊不敢濟岸

資治通鑑曰仲禮亦氣衰不敢復言戰

邵陵王綸又與臨城公大連等自東道集於南岸荊州

刺史湘東王繹遣世子方等兼司馬吳晔天門太守樊
文皎赴授營於洲子岸前高州刺史李遷仕前司州刺
史羊鴉仁又率兵繼至既而鄱陽王世子嗣永安侯確
羊鴉仁李遷仕樊文皎率衆渡淮攻破賊東府城前柵
遂營於青溪水東景遣其儀同家子仙緣水西立柵相
拒景食稍盡人相食者十五六初援兵至北岸衆號百
萬士民扶老攜幼以候王師纔過淮便競剝掠徵責金
銀列營而立至相疑貳邵陵王綸柳仲礼甚於讎敵臨

城公大連永安侯確逾於水火咸無戰心賊黨有欲自
拔者聞之咸止

魏書島夸傳曰行每募人出戰初或暫勝後必奔敗
景每宣言城中非無菜但無醬耳以戲侮之

賊之始至城中纔得固守平蕩之事期望援軍既而中
外斷絕有羊車兒戲計作紙鴉繫以長繩藏於中簡
丈出太極殿前因此西北風放之以冀書達羣賊駭之
謂是厭勝之術又射下之其危急如此

資治通鑑曰援軍募人能入城送啓者鄱陽世子嗣
左右李朗請先受鞭詐為得罪叛投賊因得入城城
中方知援兵四集舉城歡噪上以朗為直閣將軍賜
金遣之朗緣鍾山後宵行畫伏積日乃達

是時城中圍逼既久腴味頓絕簡丈上厨僅有一肉之
膳軍士煮弩燂鼠捕雀食之殿堂舊多鵠羣聚至是殲
焉初宮門之閉公卿以食為念男女貴賤並出負米得
四十萬斛收諸府藏錢帛五十億萬並聚德陽堂魚鹽

樵採所取益寡至是乃懷尚書省為薪撤薦剝嗣馬盡
又食餘焉御乾露厨有乾苔味酸鹹分給戰士軍人屠
馬于殿省間鬻之雜以人肉食者必病賊又置毒水竇
於是稍行腫滿之疾城中疫死大半

魏書魯孝傳曰軍人共於德陽殿前立市屠一牛得
絹三千疋賣一犬得錢二十萬雀鼠皆盡死者相枕
初有盜取其池魚者行猶大怒敕付廷尉既宿宿昔
俱盡

初景未渡江魏人遺檄極言景反覆猜忍又言帝飾智
驚愚將為景欺

魏書通鑑載杜弼檄曰我皇魏之垂統也駕雲車而
自北策龍御以圖南方志所不傳荒經所不綴莫不
繩谷釣山依風托水惟彼吳越獨阻聲教偽主蕭衍
矯情飾詐事非一緒毒螫滿懷妄敦戒業躁競盈胸
謬治清靜至乃大興寺塔廣善臺堂昭陽倒景垂珠
啣壁崢嶸刻削千門萬戶鞭撻疲民盡其筋骨延壞運

石悲歌掩途死而可折甘同化仙知淺謀疎曾不自
揆遇桐柏之流翻為已害子亡齊之盾忽為戎首至
於廢捐寵嫡崇樹愚子疾視扼腕二紀於茲所幸元
首懷舞戚之風上宰薄兵車之會遂解紮南冠喻以
好睦舟車遵溯川陸光華反肉還童不待羊陸雖嘉
謀長筭爰自我始罷戰息民彼護其利侯景負恩棄
德身為亂階委慈母如脫屣棄少弟如遺土羣子陸
陸妻妻成行慕姜兒夾言蔑伯春宛轉比之梟獍異

類同醜及遠托關隴委命寇逆竇炬定君臣之分黑
獺結兄弟之親授以名器救其重圍俄而背德親尋
干戈釁惡禍盈側首無托以金陵逋逃之藪江南流
遇之地甘辭卑禮詭言浮說叛豎救命豈將擇音偽
朝大小幸災忘義逐雀去草曾不是圖竊竇叛邑椒
蘭比好人而無禮其能國乎蓋物無定才事無定勢
是以吳侵齊境遂得句踐之師趙納韓地終有長平
之役況乃鞭撻疲民侵軼徐部築壘擁川舍舟徼利

是以援抱秉麾之將投距超石之士含怒作色如赴
私仇鋒刃暫交土崩瓦解解掬指舟中矜甲鼓下同宗
異姓縲絏相望曲直既殊強弱不等獲一人而失一
國見黃雀而忘深阱既誠往難逮猶將來可追若景
位班三事邑啓萬家揣身量分久當知足而周章向
背離披不已夫豈徒然意亦可見彼乃授以利器誨
以慢藏使其勢得容姦時堪乘便今見南風不競天
亡有徵老賊姦謀將復作矣然摧堅強者難為力摧

枯朽者易為功計景雖非孫吳猛將燕趙精兵猶是
久涉行陣曾習軍旅豈同剽輕之師不比危晚之衆
拒此則作氣不足攻彼則為勢有餘終恐尾大於身
腫粗於股倔强不幸狼戾雖馴呼之則反速而釁小
不微則叛遲而禍大望廷尉不肯為臣自據淮南亦
欲稱帝但恐楚國亡猿禍延林木城門失火殃及池
魚橫使江淮士子荆揚人物死亡矢石天折露霧且
偽主操行無聞輕險有素年既老矣耄又及之災異

降於上怨讟興於下恃險躁風俗任輕薄子孫朋黨
路開兵權在外必將禍生骨肉釁起腹心強弩衝城
長戈指闕徒探雀穀無救府藏之虛空請熊蹯詎延
晷刻之命外崩中潰今實其時鷸蚌相持我乘其敝
當使鍾山渡江青蓋入洛荆棘生建鄴之宮麋鹿遊姑
蘓之館若吳之王孫蜀之公子歸歟軍門委命下吏
當授客卿之秩特加驃騎之號凡百君子勉求多福 愚
按魏書所載與通鑑前後差異今合摘之如此

至是禍敗之狀皆如所陳南人咸以為識時景軍亦飢不能復戰東城有積粟其路為援軍所斷且聞湘東王下荊州兵彭城劉邈說景曰大軍頓兵已久攻城不拔今衆軍雲集未易可破如聞軍糧不支一月運漕路絕野無所掠嬰兒掌上信在于今未若乞和全師而反景乃與王偉計

資治通鑑載偉言曰今臺城不可猝拔吾軍乏食且偽請和以緩其勢東城之米足支一年因求和之際

運米入石頭然後伺懈擊之一舉可取也

遣任約至城北拜表偽降以河南自效帝曰吾有死而已寧有是議且賊凶逆多詐此言何可信既而城中曰
臧簡丈乃請於帝曰侯景圍逼既無勤王之師今欲許
和更思後計帝大怒曰和不如死簡丈曰城下之盟乃
是深恥白刃交前流矢不顧帝遲回久之曰爾自圖之
無令取笑千載乃聽之景請割江右四州地并求宣城
王大器出送然後解圍濟江乃許遣其議同於子悅左

丞王偉入城為質中領軍傳歧議以宣城嫡嗣有輕言者劍之乃請石城公大致出送詔許之遂設壇西華門外遣尚書僕射王克兼侍中上甲卿侯韶兼散騎常侍蕭瑒與於子悅王偉等登壇共盟右衛將軍柳津出西華門下景出其柵門與津遙對刑牲歃血南充州刺史南康嗣王會理前青冀二州刺史湘潭侯退西昌侯世子或率衆三萬至馬邛洲景慮北軍自白下而上斷其江路請悉勒聚南岸敕遣北軍並進江潭苑景又啓稱

永安侯確趙威方頤隔柵詎臣云天子自與爾盟我終
當逐汝乞召入城即進發敕並召之景遂運束城米於
石頭食乃足又啓云西岸信至高澄已得壽春種籼無
處安足借廣陵譙州須征得壽春種籼即以奉還朝廷
資治通鑑曰景又言授軍既在南岸須於京口渡江
太子並答許之

時荊州刺史湘東王繹師于武城河東王譽次巴陵前
信州刺史桂陽王浟頓江津並未之進既有敕班師繹

欲旋中記室參軍蕭賁曰景以人臣舉兵向闕令若放
兵未及渡江童子能斬之必不為也大王以十萬之師
未見賊而退若何繹不悅賁骨鯁士每恨繹不入援嘗
與繹雙六食子未下賁曰殿下都無下意繹深為憾遂
因事害之

遇按梁有數蕭賁其一以告南康王會理圖侯景為
景先封後殺者又其一齊竟陵王子良孫為繹法曹
參軍以譏刺繹所作檄餓死獄中者疑兩參軍即一

人記事或訛耳

景既知援軍號令不一終無勤王之效又聞城中死疾轉多當有應之既却外兵又得城東米王偉說景曰王以人臣舉兵背叛圍守宮闕已盈十旬逼辱妃主陵穢宗廟今日持此何處容身願且觀變景然之乃表陳武帝十失

梁書載景啓曰陛下往因世季光宅江表劬勞治道享年長久人主業業莫之與京然名與寔爽請一二

陳之陛下與高氏通和年踰一紀必將分災恤患寧
可納臣一介之使貪臣汝穎之地便絕好河北檄詔
高澄揚兵擊鼓侵彭宋夫敵國相伐聞喪則止匹夫
之交托孤寄命豈有萬乘之主見利忘義其失一也
臣與高澄有仇歸身有道陛下授以上將任以專征
方欲挂筇嵩華懸旌冀趙而陛下欲分其功不能賜
任使臣擊河北欲自舉徐方遣庸懦貞陽裁見旌鼓
烏散魚潰使臣狼狽失據妻子為戮陛下寔負臣之

深其失二也臣作牧壽州方欲收合餘燼厲甲候戰
雪渦陽之恥陛下喪其精魂無得守氣便信貞陽膠
啓復求通和臣頻陳執疑閉不從童子猶羞翻復沉
在人君二三其德其失三也畏懦逗留軍有常法貞
陽精甲數萬器械山積不能拒敵身受囚執以帝之
猶子而面縛敵廷宜絕其屬籍以蒙征鼓乃憐彼苟
存欲以微臣規相貿易人君之法當如是哉其失四
也懸鉞大藩右稱汝穎羊鵝仁無故棄之曾無嫌責

使還居北司鴉仁棄之不為罪臣得之不為功其失
五也臣渦陽退衄非戰之罪寔陛下君臣見誤乃還
壽春茲奉彌謹鴉仁自知棄州內懷慙懼啓臣欲反
陛下曾無辨究默而信納豈有坐人莫大之罪而可
並肩事主者其失六也趙伯超拔自無能任居方伯
朱异之徒積受金貝遂比胡趙為闕張誣掩天聰韓
山之役女妓自隨裁聞敵鼓與妾俱逝不獨貞陽論
罪應誅還處州任伯超無罪臣功何論賞罰無章失

七也臣任壽陽戍裴之悌等憚臣檢制無故遁歸又
啓臣欲反陛下不責其違命離局反受浸潤處臣如
此使何地自安其八也臣歸身有道罄竭忠規而每
有陳奏恒被抑遏朱异專斷軍施周石珍摠尸兵伏
伏陸驤徐麟典司谷帛皆明言求貨非命不行臣撫
賄於中恒被抑折其失九也鄱陽鎮合肥以藩枝每
相祇敬乃或聲言臣反或啓臣纖介招攜當須以禮
忠烈何以堪此其失十也昔韓信雄傑亡項霸劉末

為女子所烹方悔蒯通之說臣每覽書傳心竊笑之
豈容遵彼覆車以快陛下佞臣之手是以興甲晉陽
直濟長江臣枉直而指藏否誅君側惡人清國朝批
政然後還守藩服以保忠節 資治通鑑所載又不
同有曰陛下崇虛飾誕惡聞實錄以妖怪為嘉禎以
天譴為無咎敷演六藝排擯前儒王莽之法也以鐵
為貨使輕重無當公孫之制也爛羊鑄印朝章鄙離
更始趙論之化也豫章以所天為血仇邵陵以父存

而冠布石虎之風也修建浮圖百度糜費使四民飢
餒姚興之代也又言建康宮室崇侈陛下惟與主書
參斷萬機政以賄成諸奄豪盛衆僧殷實皇太子珠
玉是好酒色是耽吐言止於輕薄賦課不出桑土邵
陵所在殘破湘東羣下貪縱南康之屬皆如沐猴而
冠親為孫侄位則藩屏臣至百日誰肯勤王此而靈
長未之有也昔鬻拳兵諫王卒改善伏願小懲大戒
放縱納忠使臣無再舉之憂陛下無嬰城之辱

三年三月丙辰朔城內設壇於太極殿前使兼太宰尚書僕射王克等告天增神祇以景違盟舉烽鼓譟初城圍日男女十萬貫甲一萬至是疾疫且盡守埤者止二三千人並悉羸懦橫屍滿路無人理瘞

魏魏書島夷傳曰死者相繼無復板木乃剝柱為柩免氣熏數里爛汁滿溝洫

資治通鑑曰高祖之末建康士民服食器用爭尚豪華糧無半年之儲常資四方委輸自景作亂道路斷

絕數月之間人至相食猶下免餓死存者百無二三
於是羊鴉仁柳仲禮鄱陽世子嗣進軍東府城北柵壘
未立為景將宋子仙所敗送首闕下景又遣子於悅乞
和城內遣御史中丞沈浚至景所景無去意浚因責之
景大怒即決石闕前水百道攻城晝夜不息丁卯郢陵
王世子子堅帳內白雲朗董勛華於城西北納賊五鼓
賊四面飛梯衆悉上永安侯確與其兄堅力戰不能却
乃還見文德殿言狀須臾景先使王偉儀同陳慶入殿

陳謝曰臣既與高氏有隙歸投陛下每啓皆不獲達所以入朝而姦佞懼誅深見推拒連兵多日罪合萬誅帝曰景今何在可召來景入朝以甲士五五人自衛帶劍升殿拜訖帝神色不變使引向三公榻坐謂曰卿在戎日久無乃為勞景默然又問卿何州人來而至此妻子猶在北耶不對其從者任約代對曰臣妻子皆為高澄所屠惟以一身歸陛下又問初渡江幾人景曰千人圍臺城幾人曰十萬今有幾人曰率土之內莫非已有帝

俛首不言景出謂其廂公王僧貴曰吾常據鞍對敵矢
刃交下而意氣安緩了無怖心今見蕭公使人自惴豈
非天威難犯吾不可再見出見簡文於永福省簡文坐
與相見亦無懼色初簡文寒夕詩云雪花無有蒂冰鏡
不安臺又詠月云飛輪了無輟明鏡不安臺後人以為
詩譏謂無蒂者是無帝不安臺者臺城不安輪無輟者
以邵陵名綸空有赴援名也既而景屯兵西州使偽儀
同陳慶以甲防太極殿悉鹵掠乘輿服玩後宮嬪妾收

主候朝士送永福省撤二官侍衛使王偉守武德殿於
子悅屯太極東堂矯詔大赦自以為都督都督中外諸
軍錄尚書事其侍中使持節大丞相王如故先是城中
積屍不暇理瘞又有已死未斂或將死未絕景悉令聚
焚之臭聞十餘里尚書外兵郎鮑正疾篤賊曳出焚之
宛轉火中久方絕景又矯詔征鎮牧守各復本位諸軍
並散降蕭正德為侍中大司馬百官皆復職帝雖外迹
不屈意猶忿憤景欲以宋子仙為司空帝曰調和陰陽

豈在此物景又請以文德主帥鄧仲為城門校尉帝曰
不置此官簡丈重入奏帝怒曰誰令汝來景開亦不敢
逼甚憚之後每微求多不稱旨御膳亦被裁抑遂懷憂
憤五月感疾餒崩於文德殿景秘不發喪權殯昭陽殿
自外文武咸莫知二十餘日方升梓宮於太極前殿
予論曰世皆言梁武納侯景為失策而吾獨謂未盡
失不記魏明元與宋武交聘而一聞武殞即追執使
者親率兵取河南平梁武背東魏和以納景降亦祖

而家背宋故事耳獨惜梁武不能自將且不能將將
夫所謂將將必其將知深勇沈能先制景兼制東魏
彼梁武猶子貞陽侯淵明一紉袴子耳昔梁用臨川
王宏禦寇而畏魏如虎貽誚蕭娘若昏醉如淵明是
再見蕭娘也況又佐以善遁趙伯超為呂姥續其敗
而俘以此然則當日誰然惟羊祝耳夫侃去魏歸梁
與景志殊而迹同在此則雄名固為景所憎在南則
赤心亦為景所歛且它日居圍城中猶能出奇無方

使景屢攻屢推侃亡期城破寧有長於防城而短於禦敵者若梁武不將淵明將侃則景必垂頭弭耳惟所指揮制景乃制東魏況東魏所恃者一慕容紹宗耳侃景合力而紹宗孤智若紹宗破則北土震矣且是時大將軍高宗恃甚詈主殿君無人臣禮若梁武檄數澄罪謂吾不背歡澄詎曰無名是時也因景所納東魏土之半長驅入鄴君臣並俘奏凱南還燕趙服而關隴搖矣然後待字大黑獺死徐吞西魏為一

家使後世誦大一統者不言隨火自北并南而言梁武自南并北詎不為江左吐氣故吾謂梁武納景非失策而不將侃以將淵明為失策也何以知之則又於淵明敗後侃結陳徐還知之惜也僅用以救敗而不用以制勝

迎簡文即位及葬修陵使衛士以大釘於要地釘之欲令後世絕滅矯紹赦北人為奴婢者冀收其力用時東揚州刺史臨城公大連據州吳興太守張嵯據郡自南

陵以上並各據守景制命所行唯吳郡以西南陵以北
六月殺景蕭正德於永福省封元羅為西秦王元景襲
為陳留王諸元子弟封王者十餘人

資治通鑑簡文大寶元年五月景以元思虔為東道
大行臺鎮錢塘

以柳仲禮為使持節大督都隸大丞相參戎事十一月
百濟使至見城邑丘墟號泣於端門外行路見者莫不
灑泣景聞大怒收小莊嚴寺禁不聽出入大寶元年正

月景矯詔自加班劍四十人給前後部羽葆鼓吹置左右長史從事中郎四人三月甲申景請簡文禊宴於樂游苑帳食三日逆黨咸以妻子自隨皇太子以並下令馬射中者賞以金錢翼日向晨簡文還宮景拜伏苦請簡文不從及發景即與漂陽公主共據御牀南面與並坐

資治通鑑曰景納上女漂陽公主主有色景甚愛之羣臣文武列坐侍宴四月辛卯景又召簡文幸西州簡

丈御素輦侍衛四百餘人景衆數千浴鐵翼衛簡文至
西州景等迎拜帝冠下屋白紗帽服白布襪襦景服紫
紬褶上加金帶與其偽儀同陳慶索超世等西向坐漂
陽公主與其母范淑妃東向坐帝聞絲竹悽然下泣景
起謝曰陛下何不樂帝為強笑因曰丞相言索超世聞
此以為何聲景曰臣且不知豈獨超世帝命景起舞景
即下席應弦而歌帝顧命淑妃淑妃固辭乃止景又上
禮遂逼帝起舞酒闌坐散帝抱景於牀曰我念丞相景

曰陛下如不念臣臣何至此帝索筌蹄曰我為公講命
景離席使其唱經景問超世何經最小超世曰惟觀世
音小景即唱爾時無盡意菩薩大帝笑夜乃罷時江南
大飢江揚彌甚旱蝗相係年穀不登百姓流亡死者塗
地父子攜手共人江湖或弟兄相要俱緣山兵艾實行
花皆罄草根木葉為之凋殘雖假命須臾亦終死山澤
其絕粒久者烏面鵠形俯伏狀惟不出牖戶莫不衣羅
綺懷金玉交相枕藉待命聽終十里絕烟人跡罕見白

骨聚如丘隴焉而景虐放用形酷忍無道於石頭立大
春確有犯法者擣殺之又禁人偶語不許大酺有犯則
刑及外族其官人任兼閭外者位必行臺入附凶徒者
並稱開府其親寄隆重則號曰左右廂公勇力兼人名
為庫真部督七月景又矯詔自進位相國封太山等二
十郡為漢王入朝不趨贊拜不名劔履上殿依漢蕭河
故事十月景又矯詔自加宇宙大將軍都督六合諸軍
事以超文呈簡文簡文大驚曰將軍乃有宇宙之號乎

初武帝既崩景立簡文升重雲殿禮佛為盟曰臣乞自
今兩無疑貳臣固不負陛下陛下亦不得負臣及南康
王會理圖景景稍猜景文謂簡文也欲謀之王偉因搆
扇

資治通鑑曰景嬖溧陽公主妨于政事王偉屢諫景
以告主主有惡言偉恐為所讒因勸景除帝

遂懷逆謀矣二年正月景以王克為太宰宋子仙為太
保元羅為太傅郭元建為太尉張化仁為司徒任約為

司空於慶為太師紇奚斤為太子太傅時靈護為太子
太保王偉為尚書左僕射索超世為右僕射跨水城築
於大舫名曰捍國四月景遣宋子仙襲陷郢州刺史方
諸景乘勝西上號二十萬聯旗千里江左以來水軍之
盛未有也孝元聞之謂御史中丞宗懷曰賊若分守巴
陵鼓行西上荊郢殆危此上策也身頓長沙狗地零桂
運糧以至洞庭非吾有此中策也擁衆江口連攻巴陵
銳氣盡於堅城士卒飢於半菽此下策也吾安枕而臥

無所多憂及次巴陵王僧辨沈舟臥鼓若將已遁景遂圍城孝元遣平北將軍胡僧祐與居士陸法和大破之擒其將任約景乃夜遁還都左右有泣者景命斬之王僧辨乃東下自是衆軍所至皆捷先是景每出師戒諸將曰破城邑須淨殺却使天下知吾威名故諸將以殺人為戲笑士民雖死不從之是月景廢簡文幽於永福省迎昭明太子嫡孫豫章王棟即皇帝位升太極前殿大赦改元天正初景既平建鄴便懷篡奪以四方須定

故未自立既而已陵失律失律江郢喪師猛將外戮雄心內沮便欲速僭大號又王偉云自古移鼎必須廢立故景從之其太尉郭元建聞之自秦郡馳還諫曰主上仁明何得廢之景曰王偉勸吾元建固陳不可也

梁書載元建言四方之師所以不至正為二宮萬福若遂行弑逆結怨海內事機一去雖悔無及資治通鑑曰吾挾天子令諸侯猶恐不濟無過廢之適以自危何安之有

景意遂回欲迎簡文復位以少帝為太孫王偉固執不
可乃止景以褒太子妃賜郭元建元建曰豈有皇太子
妃而降為人妾乎竟不與相見景司空劉神茂儀同尹
思合劉歸義王曄等據東陽歸順十一月景矯少帝詔
自加九錫漢國置丞相以下百官陳備物於庭忽有鳥
似山鵲翔於冊書上赤足丹嘴都下左右所無所賦徒
悉驚駭競射不能中

三國典畧曰景將拜受冊命夜有鵠鷗鳴於太極殿

上景深以為惡自挫弦同之

景又矯少帝詔追崇其祖為大將軍父為大丞相自加冕十二有旒建天子旌旗出鷺入蹕乘金根車駕六馬備五時副車置旄頭雲罕樂儔八佾鍾虞宮懸之樂一如舊儀尋又矯少帝詔禪位使偽太宰王克奉璽綬於己先夕景宿大莊嚴寺即南郊柴燎於天升壇受禪大風拔木而蓋盡偃文物並失舊儀既唱警蹕識者以為名景而言警蹕非久祥也景聞惡之改為備蹕人又曰

備於此便畢矣有司乃奏改永蹕以輜車牀載鼓吹橐
駝負犧牲輦上置筌蹄垂足坐焉

南史輜車牀作廣柳車又輦上置下無筌蹄二字語
不明今依梁書補正

景所帶劍水精標無故墮落手自拾取甚惡之將登壇
有兔前自而走俄失所在又白虹貫日三重日青無色
將登太極殿醜徒數萬同共吹脣唱吼而上及升御牀
牀足自陷大赦改元太始方饗羣臣中會起觸宸墜地

隋書五行志曰景升園丘行不能正履識者知不免
封少帝為淮陽王幽之改梁律為漢律改左民尚書為
殿中尚書五兵尚書為七兵尚書直殿主帥為直寢景
三公之官動置十數儀同尤多或匹馬孤行自執羈紲
以宋子仙郭元建張化仁任約為佐命元功並加三公
位王偉索超世為謀主於子悅彭儒主擊斷陳慶呂季
略盧暉略於和史和安作爪牙尤為民毒其餘王伯醜
任延和等復有數十人至梁人為景用盡心竭力者則

故將軍趙伯超前制局監姬石珍內監嚴亶邵陵王記
室伏知命若太宰王克太傅元羅侍中殷不害太常姬
弘正等雖官尊止從人望非腹心任也景祖名乙羽周
及纂以周為廟諱故改周弘正石珍姓姬王諱請立七
廟景曰何謂七廟諱曰天子登七世祖考故置七廟并
請七世諱敕太常具祭禮景曰前世吾不復憶唯阿爺
名標且在朔州伊邦得來噉聞衆咸笑之景黨有知景
祖名乙羽周者自外悉王偉制其名位以漢司徒侯霸

為始祖晉徵士侯瑾為七世祖尊祖周為大丞相父標
為元皇帝時景修飾臺城及朱雀宣陽等門童謠曰的
頭烏拂朱雀還與吳

三國輿略曰景飾朱雀門有白頭烏萬餘集門樓故
童謠云云

又曰脫青袍著芒屨荊州天子擬應著時都下王侯庶
姓五等廟樹成見殘毀唯文宣太后廟四周柏獨鬱茂
及景纂脩南郊路偽都官尚書呂季略說景令伐此柏

立三橋始斫南面十餘株再宿悉生便長數丈時既冬
月翠茂若春賊大驚惡之使悉斫殺識者以為昔僵柳
起于上林乃表漢宣之興今廟樹重青必彰陝西之瑞
又景牀東邊香爐無故墮地景呼東西南北皆為廟景
曰此東廟香爐邦忽下地議者以為湘東軍下之徵景
二年謝荅仁攻東陽

資治通鑑曰謝荅仁攻神茂程靈洗張彪將勒兵救
之神效欲專其功不許營于下淮或謂茂曰賊長於

野戰下淮地平四面受敵不如據七里瀨賊必不能
神進茂不從其徧禪多圯人不與同心別將王畢等
據外營降於荅仁劉歸義尹思合等棄城走神茂遂
孤危

劉神茂降送建康景為大計確先截其尺寸斬之至
首方止使衆觀以示威王僧辨軍至蕪湖城主張黑宵
遁

資治通鑑曰景懼下詔赦蕭繹王僧辨衆皆笑之

侯子鑒率步騎萬餘人度州并引水軍俱進僧辯逆擊大破之景聞大懼涕下覆面引衾臥良久方起歎曰咄咄咄誤殺乃公景初為丞相居西州將率謀臣朝必集行列門外謂之牙門以次引進賚以酒食言笑談論善惡必行及纂後恒坐內不出舊將稀見其面談有怨心是至登烽火樓望西師見一人以為十人大懼僧辯及諸將軍於石頭城步上連營立柵至落星墩景大恐遣掘王僧辯父墳剖棺焚其屍僧辯等進營石頭城北

景列陣挑戰

資治通鑑曰景棄稍執刀左右衛陣陣不動

僧辯大破之景既退敗不敢入宮歛其散兵屯闕下

資治通鑑曰景召王偉責之曰爾勸我為帝今日誤我偉不能答

將欲逃去王偉按劍攬轡諫曰自古豈有叛天子今宮中衛士尚足一戰寧可便走景曰我在此戰抗賀拔勝敗葛榮物名河朔與高王一群人來南直渡大江取臺

城如反掌又攻邵陵王綸於北山破柳仲禮於南岸皆
爾所親見今日之事恐是天亡爾好守城當復一決仰
觀石闕逡巡歎息久之乃以皮囊盛二子桂馬鞍與其
儀同田遷范希榮等百餘騎東奔王偉遂委臺城竄逸
侯子鑒等奔廣德王克開臺城門引裴之橫入宮縱兵
蹂掠是夜遣燼焚太極殿及東西堂延閣秘署皆盡羽
儀輦路無遺王僧辯命武州刺史杜崩救火火滅僅武
德五明重雲殿及門下中書尚書省得免僧辯迎簡文

梓宮升朝堂三軍縞素誦於哀次命侯瑱裴之橫東追
賊火偽神主於宣陽門作神主於太廟收圖書八萬卷
歸江陵杜蔚守臺城都下戶口百遺一二大航南岸極
目無烟老小相扶競出纔渡淮王琳杜龕軍人掠之甚
於寇賊號叫徹石頭僧辯謂為有變亟登城問故亦不
禁也僉以王師之酷甚於侯景君子是知僧辯不得終
初景圍臺城授軍三十萬兵士望青袍則氣消膽奪及
赤亭之役胡僧祐以羸卒一千破任約精兵二萬轉戰

而東前無橫陣既而侯填追及景衆未陣皆舉幡乞降
景不能制乃與腹心人數十單舸走推墮二子於水自
浣瀆入海至胡豆洲前太子舍人羊鯤殺之送於王僧
辯

鯤本傳作鵬叔景事詳見鵬傳

景長不滿七尺長上短下眉目疎秀廣顙高顴色赤少
鬚抵眊屢顧聲散識者曰此謂豺狼之聲故能食人亦
當為人食既南奔魏大將軍高澄命先剝景妻子面皮

以大鐵鑊盛油煎殺之女入宮為婢男三歲者並下蠶
室後齊文宣夢獼猴坐御牀乃並煮景子於鑊其子在
比者殲焉景性猜忍好殺戮恒以手刃為戲方食斬人
於前言笑自若口不輟食或先斷于足割舌割鼻經日
乃殺之自簪立後時着白紗帽而尚披青袍頭插象牙
梳牀上常設胡牀及筌歸著靴垂足坐或鼓戶限或走
馬遨遊彈射鴟鳥自僭位王偉不許輟出鬱快更成失
志曰吾無事為帝與受擯不殊及聞義師轉近猜忌彌

深牀前蘭綺自遠然後見客每登武帝所常幸殿若有
芒刺在身恒聞叱咄者又處宴居殿一夜驚起若有物
扣其心自是凡武帝所常居處並不敢處多在昭陽殿
廊下啟殿屋常有鵩鵲鳥鳴呼惡之每使人窮山野捕
鳥景所乘白馬每戰將勝輒躑躅嘶鳴意氣駭逸其有
奔竄必低首不前及石頭之役精神沮喪臥不肯動景
使左右拜請或加箠策終不肯進始景左足上有肉瘤
狀似龜戰應克捷瘤則隱起分明如不勝瘤則低至敗

瘤則隱陷肉中天監中沙門釋寶誌曰掘尾狗子自發
狂當死未死啗人傷須臾之間自滅亡起自汝陰死三
湘又曰山家小兒果未臂太極殿前作虎視狗子景小
字山家小兒猴狀景遂覆陷都邑毒害皇家起自懸瓠
即昔之汝南巴陵有地名三湘景奔敗處景常謂人曰
侯字人邊作主下作人此明是人主也臺城既陷武帝
嘗語人曰侯景必得為帝但不久耳破侯景字成小人
百日天子為帝當得百日案景以辛未年十一月十九

日篡位壬申年三月十九日敗摠得一百二十日而景
以三月一日便往姑熟計在宮殿僅滿十旬先後言竟
驗又大同中太醫令朱軌嘗直禁省無何夢犬羊各一
在御坐覺而告人曰太羊非佳物今據御坐將有變乎
既而天子蒙塵景登正殿及將敗有僧通道人者意性
若狂飲食噉肉不異凡等世間遊行數十載姓名鄉里
人莫能知初言隱伏久方驗人呼為閻梨景甚敬信之
也

廣古今五行記曰揚州未陷通多拾無數死魚首積
西明門外又拔青草荆棘植之市里及景渡江先屠
東門一城置頭於西明門外為京觀井里荒蕪景又
惡通言說得失欲害而憚之乃遣將於子悅將武士
四人往候謂如預知則弗害不知則殺之子悅先入
通逆謂曰汝來殺我邪子悅拜云不敢恥報景景乃
已

景帝於後堂與其徒共射時僧通在坐奪景弓射景陽

山大呼云得奴方已景後晏集其黨又召僧通僧通取肉楹鹽以進景問曰好否景荅所恨大醜僧通曰不醜則爛及景誅僧辯截其二手送齊文宣而傳首江陵果以鹽五斗置腹送建康暴尸於士市市民爭取屠膾羹食皆盡溧陽公主亦預食焉

梁典畧曰并烹溧陽公主與此不同當從本史 愚問溧陽公主未知食景肉後嫁乎守乎獨念不更二夫為閨閣常經而惟溧陽不更逆景愈醜更矣乎曰

亦不可簡文弒則主殉或曰彼唐程氏女其父兄死於盜掠已去已隱忍十餘年手刃盜而聞祭不聞殉者非與夫能仇於失身後則不嫁勝嫁自律何必死而不能復仇於辱身後則嫁與不嫁皆不可惟有死噫溧陽安居此典畧所以有并烹溧者陽公主之說也

已焚骨揚灰曾羅其禍者以灰和酒飲之首至江陵孝元命梟於三日煮而漆之以付武庫先是江陵人謠曰

苦竹町市南有好井荊州軍殺侯景及景首至孝元付
諮議參軍李季長宅宅東既苦竹町也既加鼎鑊即用
市南水景議同謝荅曰行臺趙伯超降於侯瑱生擒賊
行臺田遷儀同房世貴蔡壽樂領軍王伯醜凶黨悉平
斬房世於貴妃康市餘黨送江陵初郭元建以有禮於
皇太子妃將降侯子鑒曰此小惠也不足自全且我曹
梁仇讐何顏復見其主乎子鑒俱奔齊王偉潁川人父
畧仕魏為許昌令偉學通周易雅高辭采仕魏為行臺

卽景叛後高澄以書招之偉為景報澄書文甚美澄覽
書曰誰作左右稱為偉文澄曰才如此何由不早使知
邪偉既協謀其文檄並偉所製及行篡逆皆偉創謀也
景敗與侯子鑒俱走相失潛匿草中直瀆戍主黃公喜
擒送之見王僧辯長揖不拜執者促之曰偉各為人臣
何事相敬僧辯謂曰卿為賊相不能死節而求活草間
顛而不扶安用彼相諱曰廢興時也工拙在人向使侯
帝早從偉言明公豈有今日之勢僧辯大笑意甚異之

命出以狗偉曰昨及朝行八十里願借一驢代步僧辯
曰汝方傳首萬里何十里哉偉笑曰乃吾心也前尚書
左丞虞隲嘗見辱於偉遇而唾其面曰死國復能為惡
乎偉曰君不讀書不足與語隲慙而退及呂季略周石
珍嚴實俱送江陵偉尚望見全於獄為詩贈孝元下要
人曰趙臺能為賦鄒揚解獻書何惜西江水不救轍中
魚又上五百字詩於帝帝愛其才將捨之朝士多忌乃
請曰前日偉作檄文有異辭句考元求而視之檄云項

羽重瞳尚有烏江之敗湘東一目寧為四海所歸

四海一作赤縣

帝大怒使以釘釘其舌於桂剗其腸顏色自若仇家齧其肉俛而視之至骨方利之石珍及亶並裔三族

趙伯超父革初至建鄴王僧辯謂曰卿荷國恩重遂復同逆對曰當今禍福恩在明公僧辯又顧謝荅仁曰聞卿是侯景衆將根不與卿交兵荅仁曰公英武蓋世荅仁安能仰敵僧戮大笑荅仁以不失禮於簡文見宥伯

超及伏知命俱餓死江陵獄彭儁亦生獲破腹抽出其
肝藏儁猶不死乃斬之也

留異東陽長山人世為郡著姓異善自居處言語醞藉
為鄉里雄豪多聚惡少陵侮貧賤守宰皆患之仕梁為
晉安安固二縣令侯景之亂還鄉里召募士卒太守沈
巡授臺讓郡於異異使兄子超監知郡事率兵隨巡出
都及城陷異隨梁臨城公大連大連委以軍事異性殘
暴無遠略私樹威福衆並患之會景將宋子仙濟浙江

異奔還鄉里尋以衆降于仙子仙以為鄉導令執大連邵
陵王綸聞之曰姓作去留之留名作同異之異理當令
同逆虜侯景署異為東陽太守收其妻子為質行臺劉
神茂建義拒景異外同神茂而密契於景及神茂敗被
景誅異獨獲免景平後王僧辯使異尉勞東陽仍糾合
鄉里保揚巖阻州郡憚焉魏克荊州王僧辯以異為東
陽太守陳文平定會稽異雖有糧饋而擁擅一郡威福
在已紹泰二年以應接功除緡州刺史領東陽太守以

陳文帝長女配異第三子貞臣即後封豐安公主者也
陳永定三年徵異為南徐州刺史遷延不就文帝即位
改授縉州刺史領東陽太子守異頻遣長史王漸為使
入朝漸每言朝廷虛弱異信之恒懷兩端與王琳潛通
信使及琳敗帝遣左衛將軍沈恪代異為郡守實兵襲
之異與恪戰敗成表啓遜謝時朝廷方事湘郢且羈縻
之異知終見討乃使兵戍下淮及建德以備江路湘州
平帝乃下詔揚其罪惡

陳書載詔曰異進謝群龍自躍於千里退懷首鼠恒持於百心賜以名爵敦以國姻仍望懷音猶能革面乃結附凶渠惟欣禍亂雖復遣家入質子陽之態轉道待子還朝隗囂之心方識罪止異身餘無所問

使司空侯安都討之異與第二子忠臣奔陳寶應及寶應平并擒異送都斬建康市子姪並伏誅惟第三子貞臣以尚主獲免

陳寶應晉安侯官人世為閩中著姓父羽有才幹為郡

雄豪竇應反覆多變詐梁時晉安數反累殺郡將羽初並扇惑合成其事後復為官軍鄉導破之一郡兵催於前已出侯景之亂晉安太守賓化侯蕭雲以郡讓羽羽年老但主郡事今竇應典兵時東境飢饉會稽尤甚死者十七八而晉安獨豐沃

陳書曰竇應自海道寇臨安永嘉會稽餘姚諸暨載粟貿易多改工帛子女其能致舟乘者並奔歸之

士衆強盛侯景平梁孝元固以羽為晉安太守陳武輔

政羽請歸老求傳郡於竇應許之及受禪授閬州刺史
領會稽太守文帝嗣位加其父光祿大夫仍命宗正錄
其本系編為宗室竇應娶留異女為妻侯安都討留異
應遣師助之又資周玳兵糧出寇臨川及都督章昭達
破迪帝因命討竇應詔宗正絕其屬籍竇應據安湖際
逆拒昭達昭達深溝高壘不與戰但命軍士伐木為簾
俄水盛乘流放之突其水柵仍水步薄之竇應衆潰執
送都斬建康市

論曰景侯起手邊服備嘗艱險自北而南多行狡算時
江表之地不見干戈梁武以耄期之年溺情釋教外弛
藩籬之固內絕防閑之心不備不虞難以為國加以姦
回在側貨賄潛通景因機騁詐肆行矯隱王偉為其謀
主飾以文辭武帝溺於知音感茲邪說遂使乘桴直濟
長江喪其天險楊旌指闕金墉亡其地利生靈塗炭宗
社丘墟於是村屯幼壁之豪郡邑巖穴之長恣陵侮而
為暴資剽掠以為雄陳武應期撫運戡定安輯留異不

願婚姻陳寶應自絕屬籍雖逢興運未改迷途志在亂
常自致方戕宜矣

愚為之論曰南史所編賊臣傳一卷皆記叛逆之臣
則內之與外何殊然誰為賊臣俾嚴斧鉞之誅陳霸
先王僧辯以廢梁敬為辭而既篡復弑則賊矣獨蕭
衍初意以南海置齊和猶善而卒聽沈約言以弑無
有初心可原等賊也雖若輩不以賊臣幸乎嚴於臣
而恕於君曰否否書廢書弑於史諱而予揭亦既凜

凜帝紀矣臣之固賊君而亦賊何窮焉或曰李延壽
著南北史北詳南略獨北史無賊臣傳何居曰是乃
所以扶南而抗北也臣以其罪斯君正其名

南北史合注卷八十六